



Uunga: Jens NapätôK´  
Inatsisartunut ilaasortaq, Parti Naleraq

09-03-2020  
Sags nr. 2020 - 4402  
Akt nr. 13187181

## Coronavirus pillugu §37 naapertorlugu apeqqummut akissuteqaat

Asasara Jens NapätôK´

Inatsisartut suleriaasiat naapertorlugu coronavirus-imut upalungaarsimanermut atatillugu apeqquteqaatinnut qujanaq. Apeqqutit ataani akissavakka.

Postboks 1160

Tlf: 34 50 00

Fax: 34 55 05

3900 Nuuk

Email: [pn@nanog.gl](mailto:pn@nanog.gl)

[www.naalakkersuisut.gl](http://www.naalakkersuisut.gl)

### 1) Naalakkersuisut pilersaaruteqarpat qanoq iliuusissamik pilersaarummik coronavirusimik tunillatsitoqassagalarpat?

#### Akissut:

Nunatsinni Coronavirus-imik tunillatsissimasumik eqqugaasoqassappat Naalakkersuisut Kalaallit Nunaanni Tunillaassortunik Nappaalanersuaqarneranut Ataatsimiititaliarsuup upalugaarsimaneq pillugu innersuussutai malippai. Tamaakkaluartoq upalungaarsimanerup allanngorsinnaanera nalunaarutigissavarput. Coronavirus pillugu paasisutissat iliuusissallu ingerlaavartumik nutarsarneqartuarput nunatsinni nakorsaanerup nittartagaani [www.nun.gl](http://www.nun.gl) takuneqarsinnaallutik. Coronavirus-ip tunillaassuunnissaanik iliuuseqarnissamut pingaarnertut maannakkumut anguniangaasoq tassavoq tunillaassuunnerup unitsinneqarnissaa imaluunniit, minnerpaatut, tunillaassuunnerup annikillisinneqarnissaa. Tamanna pissaaq tunillanneqarsimasinnaasut tamarmik, allanik tunillaannginniassammata angerlarsimaannartinneqarnerisigut. Taamaaliornikkut neriuutigineqarpoq, piffissap sivikitsup iluani tunillanneqarsimasut amerlerujussuarnissaat pinngitsoorneqarsinnaasoq, taamaattoqarpat peqqinnissaqarfimmut annertuumik unammillernartuusinnaammat. Tunillanneqarsimasut ikinnerusut sakkortuumik napparsimalissasut naatsorsuutigineqassaaq. Periusissiaq WHO-p kingullermik innersuussutaanut naapertuuppoq.

Naalakkersuisut nalunaarutigisinnaavaat, coronavirus-imik tunillatsittoqarsimaneranut pasitsaassinermi aamma tunillatsittoqarsimanerani Kalaallit Nunaanni Peqqinnissaqarfiup nunatsinni nakorsaanerup innersuussutai malissammagit. Matuma ataani paasissutissiissutigineqarsinnaavoq inunnik taakkuninnga isumaginninnissamut pilersaarummi peqartoqarmat. Sapinngisamik oqarasuaatikkut misissorneqartassapput tassani tunillatsissimasinnaanermut aarlerinaat, nappaatip ersiutaanik ersersitseqaarneq, nappaatip ersiutai aamma angalaffigisimasat pillugit paasissutissanik katersinikkut. Nakorsap nakorsaanissamut akisussaasuusup imaluunniit peqqissaanermik suliaqartup allap Nunatta nakorsaanera attavigissavaa, taanna misissuinissamut, unitsitsinissamut immaqalu angallassinissamut siunnersuissaaq.

Nakorsiamik coronavirus-imik tunillatsissimasutut pasineqartumik imaluunniit tunillatsissimasumik Peqqissaavinni, Qitiusumik napparsimavinni il.il. tigusinermi, eqqiluisaarnissamut malittarisassanik suliaqartoqarnikuuvoq. Nakorsiaq inimi kisimiittarissamiitinnegassaaq, nakorsiaq sulisunik pisariaqartunik taamaallaat iserfigineqassaaq kiisalu qanermut assiaqummik, nakorsiap nammineq atisinnaasaanik tunineqassalluni. Pisuni taama ittuni nakorsiap napparsimasimanerisa oqaluttuarisaanera aamma nalinginnaasumik qanoq issusaa sapinngisamik ungasianiit nalilerniarneqassapput, nakorsiallu perulungitsut sapinngisamik sulisunik qanimut timikkut attuinaveersaassapput. Nakorsiamik isumaginninnissaq pisariaqarpat, sulisut atortunik tunillatsinnissamut illersuutaasunik atisaqartariaqarput, aaqqatinik, kiillimik atisat qaavisigut atisakkamik, takisuunik talitalimmik imerpalasumullu pitagassaanngitsumik ataasiartakkamik, qanermut assiaqummik aamma niaqorornaveeqqummik kiinnamut assiutitalimmik/isinut illersuutitalimmik atornikkut. Nakorsiamik timikkut attuinissaq sioqqullugu attuereernikkullu, assaat imermik qaqorsaammillu erroreernerini, assaat eqqiluutsuutinniarlugit assannut bakteriaajaammik aalakoornartortalimmik salinneqassapput.

**2) Nunatsinnut kangianiit suliaqartoqartut eqqarsaatigalugit nakkutigineqarpat, nunatsinnut coronaviruseqarlutik tikeriasaannginnissaat qulakkeerniarlugi?**

**Akissut:**

Nunatta Nakorsaaneqarfia inuit tunillatsissimasutut pasineqartut imaluunniit tunillatsissimasut pillugit peqqinnissaqarfiup iliuusissaanik nassuiaasumik, peqqinnissaqarfiup atugassaanik ilitsersuummik nassiussinikuuvoq. Ilanngullugu qulakkeerneqareerpoq, peqqinnissaqarfimmi immikkoortuni attuumassuteqartuni tamani misissugassanik nassiussinissamut atortunik pisariaqartunik aamma illersornissamut atortunik pisariaqartunik peqartoq.

**3) Naalackersuisut nappaat nunatsinni siuaruaaterujussuarnissaanut pinaveersaartitsinermik pilersaaruteqarpat?**

**Akissut:**

Kalaallit Nunaanni Tunillaassortunik Nappaalanersuaqarneranut Ataatsimiititaliarsuup ilaatigut suliarisarpai tunillaassortunik nappaalanersuaqarnerani qanoq iliornissamut piareersaatit, taamaattumillu taassuma qulakkiissallugu coronavirus-ip nunatsinni siammannginnissaa. Tunillaassortunik Nappaalanersuaqarneranut Ataatsimiititaliarsuup nalilerpagu, coronavirus-ip tunillaassornissaanut piareersimanissamut iliuuseqartoqarnissaanut aamma pinaveersaartitsisoqarnissaanut pisariaqartitsisoqartoq, tamanna illuatungiusut attuumassuteqartut suleqatiginerisigut suliarineqassaaq. Maannakkuugallartoq Nunatta Nakorsaaneqarfia inuit tunillatsissimasutut pasineqartut imaluunniit tunillatsissimasut pillugit peqqinnissaqarfiup iliuusissaanik nassuiaasumik, peqqinnissaqarfiup atugassaanik ilitsersuummik nassiussinikuuvoq. Ilanngullugu pisunut, inuk ataaseq imaluunniit inuit arlallit tunillatsissimanerinek pasitsaassisoqarneranut iliuusissanik pilersaarutunik suliaqartoqarnikuuvoq. Kalaallit Nunaanni Tunillaassortunik Nappaalanersuaqarneranut Ataatsimiititaliarsuaq pisut malinnaaffiginialugit kiisalu upalungaarsimaneq naleqqussarniarlugi akulikitsumik naapittarnini ingerlatiinnassavaa. Naalackersuisut aamma Nunatta Nakorsaaneqarfiata pisumi ineriartorneq qanimut malinnaavigaat, ingerlaavartumillu nunani tamalaani pisut pillugit paasissutissanik pisassallutik.

Nunatta Nakorsaaneqarfiata nittartagaani paasissutissiisarnissamik aallartisaasoqarnikuuvoq, kiisalu Kalaallit Nunaanni nutaarsiassaqaartitsivinni tamani tamanna pillugu

eqqartuisoqartarnissaanut qulakkeerinnittoqarnikuulluni. Mittarfinni paasissutissank nivinngarsuisoqarnikuuvoq kiisalu iliuusissanik allanik pilersaarusiortoqarnikuulluni.

**4) Takornarissat, umiarsuit assigisaallu pillugit qanoq iliuusissaasinnaasumik pilersaaruteqartoqarpa?**

Maanna mittarfinni paasissutissanik nivinngarsuisoqarnikuuvoq, taamaasillutik angalasut qanoq iliuusanerlutik ilisimassammassuk. Suli umiarsuarni takornariartaatini ilaasut qanoq iliuuseqarfiginissaannut isummertoqanngilaq, qanittumi tulattoqartussaangimmat, nunarsuarmilu pisut sukkasuumik allanngortarmata. Kalaallit Nunaanni innuttaasooq imaluunniit takornariaq tunillanneqarsimanera pasitsaanneqarpat imaluunniit tunillanneqarsimappat, Kalaallit Nunaanni Peqqinnissaqarfiup nunatta nakorsaanerata ilitsersuutaa malissavaa. Tunillaassortunik Nappaalanersuaqarneranut Ataatsimiititaliarsuaq suliamik tigusinikoq Kalaallit Nunaanni Politiinit aqunneqarpoq, taakku nunatta nakorsaanera isumasioqatigalugu, aalajangiisinnaapput, suut aaqqiissutigineqaqqissanersut. Inuk imaluunniit inuit arlallit coronavirus-imik tunillanneqarsimasutut pasineqartut pillugit iliuuseqarnissamut kiisalu ilaasut allallu tunillanneqarsimasinnaasut pillugit iliuuseqarnissamut pilersaarummik peqarpoq. Inuit, tunillanneqarsimanissamut appasissumik aarlerinaateqartutut aamma inuit tunillanneqarsimanissamut qaffasissumik aarlerinaateqartutut isigineqartut immikkoortinneqarput.

Naalackersuisut aamma Nunatta Nakorsaaneqarfiata suliamut attuumassuteqartut suleqatigai, assersuutigalugu WHO, Statens Serum Institut aamma Danmarkimi Peqqissutsimut Aqutsisoqarfik, taakku coronavirus pillugu siunnersuinerimi kiisalu ilitsersuutinik nutarsakkanik tapertaapput. Tunillaassortunik Nappaalanersuaqarneranut Ataatsimiititaliarsuaq pisinnaatitaavoq ass. nunamut nunamillu aallarnissamut malittarisassanik suliaqassalluni, imaluunniit tunillaassuttoqarnissaanut aarlerinaatip annikillisarnissaanut atatillugu allanik iliuuseqarnissamut pilersaaruteqassalluni, tamanna pisiaqartutut nalilerneqarpat.

Ataatsimiititaliarsuarmut ilaasortat makkuupput; politimesteri, nunatta nakorsaanera, nakorsat qullersaat aamma nunatsinni nakorsaaterisuuneq, uumasut nakorsaasa qullersaat, ilanngaaserisoqarfimmit sinniisoq aamma kommuninit sinniisoq.

Inussiarnersumik inuulluaqquusillunga

  
Martha Abelsen